

Léopold Devismes aura bientôt cent ans.



Dans nos villages, il est connu par tous. C'est un merveilleux conteur, il chante, joue de l'harmonica et de l'accordéon, il a toujours de bonnes blagues à raconter. C'est un des piliers du Foyer Rural.

Voici une de ses chroniques... en Picard bien sûr.

souv'nirs ed Noé, tant attendu...

Oui, i l'a té vraimeint long-temps attendu dins tous ches familles, éch noé lo. Ch'n'est poén té un noé comme ez z'eutes.

Après un an d'guerre, l'exode in 40, choncq ans d'otchupation, la fin d'ches horreurs ed ches camps d'concentration pi el libération ed des chintaines ed mille prisonniers intassés din des barraq'meints derrière ches fils barbelés, norris avec des choux pi des tabagas.

Chés homes lo ont té pu d'sept ans au service ed la Patrie : 15 moés d'service militaire, un an d'guerre pi choncq ans d'captivité.

Pi ch'quo n'sait pu, chest ceux d'la classe 1935 qui avoait'té fini leu temps ont té maint'nu sursitaires un an pour ech corridor ed Dantzig, in 1938, où la France avoait mobilisé tous ches réservistes à rapport à ch'plébicite ed la Sarre. Pour ches all'mands, des sudetes qui otchupoait't la Tchecoslovaquie n'étoait'té poén respectées. Hitler n'admettoait poén qu'des hommes dé s'nationalité fuch't t'ecmandé par des étrangers (discours prononcé al radio début septembre). Comme ches soldats lo n'ont poé té libérés, avec leu choncq ans d'captivité ont passé huit ans même huit ans d'mi au service de la Patrie, tout l'plus bieu d'leu jonesse, pensez-z'y.

Chest pour o qui l'avoait'té tant attendu ch'noé lo. Oz' étoait si heureux ed s'ertrouver in famille après tant d'énées d'séparation, mais malheurs'meint poén pour tout l'monde.

Tout o chest du passé, mais a foait parti d'ches bieux contes ed noé. In-hui, chest l'évolution, tout est bien cangé heurus'meint. Au noé ech l'ergeint al vionne, même si o n'croait n'y a Diu n'y a diabe, chest ein peu la bombance.

I yo 80 ans, quant arrivoait l'noé avec quéques piots d'em n'âge, o roulayouèmes din ches cortis cueillir du d'gui pi du houx qu'oz alloèmes distribuer Mon d'ches geins qu'oz avoèmes l'habitude ed souhaiter des boènnes énéés. I décoroait't l'intérieur ed leu mouéson in mariant ches branques perlés rouge perlés blanque. Chest noé fleuri, chez-nous, i n'in métoait't d'sous l'suspension d'leu grande lampe à pétrole, tout' alintour éd leu jeu d'écminée, din des potries pi à l'mposte ed leu porte. Des sapins, o n'in voéyait qua mon d'ches bourgeois mais n'étoait'té poé illuminés pi quo n'avoait poén d'extricité. Tout foaisant no distribution, o n'in profitoèmes pour canter au djénel, o récouoaime quiques pémes ed warde pi quiques piéches deux sous. Comme des piots oz étoèmes heureux.

Au noé, ch'qui comptoait pour ches pauvres geins, chétoait l'messe ed minuit. Quant oz intindoait cho cloque sonner l'darrin, din les rues d'no piot village, éch n'étoait quèd zallées venues ed geins tout ramintouflés s'éclairant avec inne lanterne à pétrole ou coèr al lueur d'inne camuche à candelle pour érjoinne no pieute église. O voéyoait anmzur étou inn vieille fème t'nant pa l'main un couvet imbrassé d'inne troube ou deux pou s'cauffer pendant l'messe.

Ches viux lo, in rintrant, s'attabloait't à un couét d'feuvettes avec ed l'andouille ou un morcieu d'courrée pa d'sus inne gatées d'queudé arrosé ed flipe boén et queud.

O étou chest des contes d'noé, mais d'ches pauvres geins o n'nons connu des bieux pi des moins bieux, mais pour ém fème et pi mi no pus bieu ed tout no vie chest bienté ch'ti lo éd mille neu cheint quarante choncq. Comme grameint d'monde éd pus d' z'énées qu'ol l'attindoait.

Oz avoèmes décidé d'no rassembler mon dém' sœur, in famille, à Huppy ou qu'min bieu frère pi min frère étoait't ed ches darrins rapatriés.

L'jour arrivé, après avoèr foait no hour ed cour, pendant q'jatloais no viux cabriolet ém fème al avoait habillé no 4 piots pi bien ramintouflé din des couvertures avec briques bien queudes, i jléoit à pierre feinde. Ed Boëllincourt à Huppy i yo 12 tchilomètes, avec no viux bidet i folloait compter aller-r'tour troés heures, chétoait des piots in bas âges, no première n'avoait qu'six ans, i n'faulloait poén qui l'euch'té froéd. Zés v'lo installé bien conteint au fond d'cho voéture, ém mère assis sur cho

bantchette arrière a t'noait no piot dernier bien au queud din sin gron, m'fème pi mi pa d'avant avec inne grosse catlongne sur nos gnoux, oz avoèmes nos nez face à ch'veint d'bise qui annonchoait des neiges. No v'lo parti si heureux tout l'monde quo n'pinsoème mi à ch' froéd.

Chétoait inne vraie embarcation, partir nuitam'meint par un froéd d'canerd avec quate piots in bas-ages al lueur d'inne lanterne à bougie, avec un viux gvos, foaire aller-r'tour 24 tchilomètes, folloait compter troès heures ed voéyage sans imprévu mais no r'tour din ches neiges à 3 heures du matin nos a donné bien du souci.

Ch' l'aller s'étoait bien passé, oz'étoèmes arrivé à l'heure. Chom mouéson al étoait pleine. A peine déchindu, tout l'monde étoait autour ed nos piots, surtout min frère pi min bieu-frère qui n'zes connoissoait té poén, ol l'étoèmes heureux.

Après avoér bu inne bavaroise bien queude, no v'lo parti tortous al mèsse qu'avoait liu d'leute bout dé ch'village din inne vieille grange aménagée (ch' l'église avoait subi des bombardements). I c'minchoait à voler des neiges. Comme oz' étoèmes in n'avanche, éch suisse a foait placher nos piots à ch'deuxième bancs, tout prés d'cho crèche, mais alors inne crèche vivante merveilleus'meint décorée comme on' n'avons janmoais r'vu d'pareil. Inne jone fème vêtue pour la circonstance erprésentoait la vierge agnouillée prioait d'avant ch' l'éfant Jésus sur dop' paille dalée à terre. A lintour d'elle, ches apôtres avec des catlongnes sur leuz' épeules, pi piot Dré ch' bertcher vétu dé s'nhouplanne étritché su s' n'houlette avoait à ses pieds inne bérbie avec es' n'égneü, Léonard avec sin beudet, toute étoait au complet, pèrsonne n'avoait jamais vu inne chose pareille, étoait merveilleux, tout l'monde étoait ravi pi nous d'vir nos piots si heureux. A l'époque, chétoait l'abbé Lejeune un jonne tchuré estimé des' alintours. D'avant décmîncher s'messe, i l'o prononcé un discours émouvant pour ches prisonniers rintrés au foyer. Comme tout l'monde parraïsoait heureux d' s'étrouvoer in famille. Chétoait inne messe tout in cantique qui o finie par un vibrant Minuit Chrétien canté par tous ches assistants.

Quant o sommes sorti i y'avoait un pieud d'neige, inne vraie nuit d'noé ; pi a continoait d'tchair. Min bieu-frère pi mi oz'ons un piot sur nos' épeules, pendant qu'ém sœur pi m'fème t'noait'té no première pas l'main, no piot darrin i l'étoait resté à chom mouéson avec manman.

O nos sommes dépêché d'rintrer pour nos' assir à inne boénne tabe.

Tout boustifaillant, tout l'monde racontoait ses misères ed d'guerre, sans vir passer ches' heures. Quand oz' y ont pinsé, ch' l'éduille dé ch' l'horge a rmontoait troès heures. I lo fallu réveiller ches piots, r'foaire cauffer des briques pi pincer à r'partir. Quant tout l'monde a té prêt, j'ai té ratler no cabriolet, cho neige à n' n'tchéyoait pu mais i yé n'avoait inne rude épaisseur. J'nel foaisoait poén vir mais j'n'étoais poén rassuré du tout pasqué quant les sabots d'no bidet étoait'té botés ch' n'étoait qu'des glinchades, no pauve bidet né n'toait pus pied. D'foaire 12 tchilomètes din des conditions pareil a n'étoait poén rassurant.

No vlo tout même rimbartché, o n'avanchoème poén vite, i follouot suir ches bas coté in s'erpérant al distance ed ches abes, i y avoait poé d'eute solution. Jusqua ch'bos de Bouinost avoait coer té a mitan, mais comme i y avoait des amas d'neiges o n' n'voeyoait poé ches dénivelmeint, i y o inne reue qu'a la tcheu din inne grosse signée, a cratché un boén coup, o zons té étotché, blotché sur plache après avoér té ploté ed droète ed geuche, m'fème et pi manman son écrites pi parti à braire pi ches piots pareil. J'ai ieu rud'meint peur, no bidet qui l'étoait si brave s'étoait arrêté net, i l'avoait surmeint comprend qui y avoait du danger. Ej sus seuté tout d'suite à terre pi foait l'tour d'no attlage avec cho lanterne pi tout d'suite rassuré mes geins in leu recmandant dé n'point bouger qui reste assis pi d'calmer ches piots qu'in' n'allant tout duch'meint oz' arrivroème à rintrer. Mais j' n'étoais poén fier pasqué i y avoait deux mortaises cassées à ches deux gites pi cho tchaisse propremeint dit a r'posoait su ch' l'essiu mais a s'trouve calée in tardeu ches r'sorts. J'ai preind min bidet pa l'bride in li foaisant inne pieute tape su s'nincolure. Heureus'meint qui l'avoait arrêté net pi in i parlant tout duch'meint o nos sommes satché d'cho signée. I comprindoait tout ch'qué j'li disoait. Heureus'meint qui l'étoait brave i n'li mantchoait qu'la parole. Inne foés sorti d'no mauvaise posture, j'ai l'lé preind pas l'bride pour miux m'erpérer, mais i y avoait rien à foaire chétoait toujours des glinchades qui l'fatidjoait't tell'meint qui l'étoait un sueur pi mi malgré ch'froéd éj n'in souer aussi ed détrèche. Qué soulag'meint quant o sommes arrivés ein heut d'el cote ed Boéllincourt. Avec inne peinture ed 10% i lo follu qu'tout l'monde décheinche ed voéture, à n'eu poé té possibe autremeint. M'fème à t'noait no piot darrin à sin co, pi un deuxième pa l'main, à l'avoait bien des peines à marcher, manman chétoait pareil, à t'noait ches deux pu grandes. Mi j'essayoait d'guider no bidet din ches riots, à n'étoait poén facile, i foaisoait des glinchades ed plusieurs métes. O zon té un rude momeint à décheinde cho côte, mais qué ouf ed soulag'meint quant o sommes arrivés à no barrière. J' n'avoais rien dit, mais tout l'long d'chu cmin, javoais ieu peur ecqu din ses glinchades ecqu min bidet i s'tchulbute pi qui n'peuche poin s'erlever. Cmeint quo zéroaimes foait ! A n'eu poé té bieu.

Pendant qu'j'avoais détlé pi donné l'avinne à no g'vos, m'fème al avoait dhébillé pi coutché ches piots. O zons bu un café bien queud pi o zons cangé d'habits pour aller traire nos vaques pi r'foaire no hour ed cour, y l'alloit éte 6 heures du matin. Malgré tous ches péripécies pi l'peur quoz avoèmes ieu au r'tour, ch'pu bieu noé d'no vie chétoait ch'ti lo ed mille neu cheint quarante chonq, o nin rioèmes chaque foés quo n'in r'parloèmes.

Chest un conte ed noé authentique vetchu à cheint pour cheint.